

SCACS

Dutis lis regulis dal zûc si imparin a scuele, par furlan

Imparâ i scacs e, zuiant, imparâ une lenghe. Al è chest l'obietîf di un projet de scuele di scacs Vera Menchik, sostignût de ARLeF - Agenzie regionâl pe lenghe furlane, che al è rivât insom cu la stampe dal libri "SCACS. Dutis lis regulis dal zûc (e alc di plui)". Un strument gnûf che al sclaris il movisi armoniôs, e cualchi volte aventurôs, dai tocs, intes sessantecuari cjasis de scachiere, e che al vûl testimonêa cemût che une lenghe minoritarie e puedi cjatâ il so puest intune forme di comunicazion gnove, ma tal stes timp antighe.

Il libri al è stât presentât di pôc in ocasion dai Campionâts talians di scacs dai Zovins, che a son stâts fats a Tarvis. A son intervignûts i representants plui impuartants de Federazion scachistiche taliane, il diretôr de ARLeF, William Cisilino, in plui che Vanni Tissino, responsabil de Vera Menchik, che al à sclarî: «*La capacitât dal zûc dai scacs di passâ i secui e di continuâ a jessi praticât, e*

rimande ae stesse fuarce des lenghis minoritariis che si passin di mari in fi intal timp. Di chest e je nassude la idee di un meti adun un supuart par un projet di insegnament dal "nobil giuoco" in lenghe furlane».

Il binomi furlan-scacs al ufris ai fruts une vore di vantaçs: la educazion plurilengâl, cemût che e dimostre la ricercje scientifiche, e puarte ai frutins beneficis di cognitîfs, sociâi e culturâi. Introdusi il zûc dai scacs vie pe etât evolutive al jude fruts e fantats a passâ tapis fundamentâls intal disvilup dal cerviel, de personalitât e dal compartament.



Propit su la fonde di cheste premesse impuartante, al è stât definît il projet che, pe prime volte in Italie, al fâs in maniere che une lenghe minoritarie, il furlan, e sedi doprade intes scuelis par insegnâ il zûc antîc e nobil dai scacs.

A son tancj i istitûts scolastics che a àn dit di jessi interessâts a ospitâ, de prossime Sierade, un cicli di vot lezioni. I docents de scuele di scacs Vera Menchik a dopraran apont la gnove publicazion par furlan par insegnâ tant la part teoriche che chê dal zûc pratic, cul obietîf di fâ partecipâ i zovins arlêfs al Campionât Studentesc di scacs.